

求知齋  
叢書

漢書地理志水道圖說補正

自序

戊寅歲從吳學政於廣東始識番禺陳君讀所著漢書地理志水道圖說詫爲奇創久之購得嘉定錢氏新輯注臨海洪氏疏證陽湖李氏益陽胡氏所刊

大清一統輿地諸圖思參校異同猝未暇也比歲分教平陽與諸生討論藝文志旁及是編條疏所疑成補正二卷距陳君之歿後十餘年矣孤羈海曲無同志相益輒錄而存之漢世圖籍祕在禁中召陵高密諸大儒解字注書咸以斯志爲據後之作者不能記遠采零雜之言用意損增浸成歧互仁和趙氏休寧戴氏校釋水經

初分條脈洪氏篤守古義錢氏通以證今陳君兼綜眾  
家約歸於一所得之數蓋已踰十之七八蒙復蒐其遺  
略鉤稽隱晦標著古迹以合今形學派既開真源日出  
爲艸亭之業者當亦共樂乎是也光緒二十一年冬十  
月旣望錢塘吳承志記

序

班書地理志循神禹之蹟下逮炎漢其於郡縣巨川窮  
竟源委後之學者迺得水地相資探尋往迹史家踵起  
用爲準繩班氏之功偉矣番禺陳氏勗爲漢書地理志  
水道圖說据今圖以求合於古號稱精覈吳祁甫廣文  
讀其書而善之更以暇日覃精攷索於陳氏所未詳者  
補之其疏舛者糾正之廣徵古籍又取 國朝鉅儒顧  
景范齊次風趙東潛洪更生錢獻之洪筠軒徐星伯諸  
先生之書參稽眾說證合今形其尤精者則能審辨班  
志原文之譌斂如櫛得條据應劭音義知澤中二字爲

羌谷之誤元水條据水經注知東入濡水爲出東北入  
濡水之脫文遼水條博引諸說知番汗爲番沛之誤國  
水据文選注園垣古通知國字爲園之誤虜沱別水首  
受虜沱河東至東光据本志十三國域分知東光爲東  
州之誤如斯之類未易更僕又審正班志有以應劭音  
義竄入志文者如沛水出塞外西南入海下涅水也三  
字滇池下滇池澤在西北六字實皆音義之文其讀書  
精審尤爲前人所未逮蓋諸史傳本轉寫積譌版本異  
同實資斟酌匪惟東塾之諍友抑亦蘭臺之功臣至若  
益州越嶲二郡諸水導源徼外者動與他國相涉昔賢

纂述得自傳聞今日航輟交通游歷之記多由目驗新  
譯圖籍今詳於古則又時爲之也廣文出長沙王益吾  
祭酒之門祭酒漢書補注於地理志水道采擷羣籍訂  
論正繆往往與廣文此書脗合誠可謂沉潛一氣者矣  
補松吳文訪求廣文遺書最後獲此手稟有廣文自敘  
蓋爲寫定之本因詮次爲上下卷以授承幹亟爲敘而  
刊之歲在辛酉人曰吳興劉承幹序



漢書地理志水道圖說補正卷上

求恕齋叢書

錢塘吳承志纂

吳興劉承幹校

冥安 南籍端水出南羌中西北入其澤溉民田

今甘肅安西州布隆几勒河出州南境西北流入

哈勒池

蒙按籍端水蓋今甘肅玉門縣西苦峪城東布隆  
几勒河出縣西南境北流至縣西北漢時此水又  
北入達巴遜池今屈西與西拉噶金河合與古異  
也志文西字當在出下應劭曰北入其澤所據本



不誤上南字據太平御覽衍曰顏師古注引應音義

冥水出三字為句言冥水所出也冥水即籍端水

猶臨潼水下云潼水所出潼水即志馳水皆以縣

名為水名北入其澤是述志文據此知北本無

西字元和郡縣志瓜州晉昌縣冥水出吐谷渾界

流入大澤東西二百六十里南北六十里澤徑甚

廣今達巴遜池東西百六十里南北四十里大澤

必此徑數小於元和志所云古時此澤蓋東聯阿

拉克池西跨布隆几勒河與柳湖下流之小澤及

月牙湖窟隆河通合為一今沙漲澤縮池湖水斷

各自為泊為河布隆几勒河自涸澤中流出故與

古形不同齊氏召南水道提綱云布隆几勒河北

流折而西經安西府北至古沙州北境上源曰昌

馬河至柳溝衛會南境北來之十道溝曰蘇賴河

又西會窟隆河不具此池徐氏松西域水道記云

昌馬河北流分為二東支注達布遜淖爾亦曰華

海子西支為靖逆渠又西與蘇勒河合蘇勒河導

源南山北流過苦峪城東又北合於昌馬玉門之

北有布魯湖西北三十里青山湖西北七十里又

名撓斯圖湖華海子諸湖通謂之冥澤則蘇勒尾  
閭河流既改遷徙靡常今三道溝東里許有枯河  
寬百許丈兩岸有衝突形當亦蘇勒故道蘇勒卽  
蘇賴達布遜卽達巴遜布魯青山兩湖俱卽達巴  
遜池之別名三道溝東有枯河寬廣百丈北出卽  
池岸爲元和志冥水入大澤之故渠無疑圖說從  
提綱以布隆几勒河爲籍端水不誤下流云入哈  
勒池則誤以元明以後之迹爲古哈勒池東西八  
十里南北三十里較大澤小至九分之六七非冥  
水所注甚明晉昌故城洪氏亮吉乾隆府廳州縣  
圖志云在安西州東元和志縣東二十步有玉門  
關東北八十里有合河戍南一百六十里有雪山  
積雪夏不消玉門關爲肅州玉門縣西出之關合  
河卽冥水與玉門縣水流合之河水道記枯河與  
靖逆渠古時會合於此故曰合河雪山今布隆几  
勒河源以南之大山以三地地數校之晉昌所  
在乃州東南非正東布隆几勒河有二源西源近  
西拉噶金河源於苦峪城爲西南晉昌接玉門關  
當尙在城東籍端水在冥  
安西南羌中似亦無疑

龍勒 氏置水出南羌中東北入澤溉民田

蓋今甘肅玉門縣故赤金衛南山水出縣南境東

北流入阿拉克池

或以氏置水爲今西拉噶金河然西拉噶金河西北流與志云

東北不合又其水入布隆几勒河而志不言入南籍端水亦不合也赤金衛水東北入澤與志合故疑爲氏置水矣

蒙按氏置水蓋今甘肅敦煌縣察罕烏蘇水出縣

南境東北流合西拉噶金水曰西拉噶金河又北

分爲二派東一派與布隆几勒河合其故瀆也漢

時此水又東過今安西州至雙塔塗入達巴遜池

今布隆几勒河改流此水不入池與古異

西域傳烏孫國

肥王翁歸靡胡婦子鳥就屠自立爲昆彌漢遣破  
羌將軍辛武賢將兵萬五千人至敦煌遣使者案  
行表穿卑鞞侯井以面欲通渠轉穀積居盧倉以  
討之注引孟康解云大井六通渠也下泉流湧出  
在白龍堆東土山下宋祁校云面當作西卑鞞侯  
井以西之渠卽今西拉噶金河西派自雙河岔流  
至蘇魯圖山麓瀦爲哈勒池之渠穿通在宣帝時  
非氏置水正瀆故志不具此渠開後東派漸微孔  
穎達書禹貢正義引酈道元水經注黑水出張掖  
雞山南流至敦煌過三危山張守節史記夏本紀  
正義引魏王泰括地志黑水源自伊吾縣北百二  
十里又南流二十里而絕三危山在沙州敦煌縣  
東南四十里水經注括地志所云黑水俱卽西拉  
噶金河其說由按圖索迹不根考記載致誤以源  
爲委以逆爲順水經注所據圖本以張掖河所合  
之卯來河源與布隆几勒河所合之昌馬河源連  
合爲一因遠據張掖水爲源布隆几勒河下流與  
西拉噶金河下流圖形與漢迹不異括地志劃出  
張掖水別敘敦煌水源云出伊吾縣北伊吾正義  
以爲伊州其地在今新疆哈密廳境與敦煌隔戈

壁不可通合晉書地理志有伊吾屬敦煌郡通典  
州郡門云瓜州晉昌縣北有伊吾城晉昌北伊吾  
近今安西州於西拉噶金河東渠為南地形相符  
括地志所云必晉伊吾故縣黑水源於此所據之  
圖此水與晉昌縣之大澤必斷絕不相接屬彼時  
東派蓋已涸竭元和郡縣志云懸泉水在敦煌縣  
東一百三十里出龍勒山腹水有靈車馬大至則  
出多少至則出少龍勒山入壽昌縣云縣本漢龍  
勒因山為名龍勒水在縣南一百八十里龍勒山  
上懸泉水出龍勒山腹流至敦煌縣東是即西拉  
噶金河水有出多出少之異明是川形有變易  
矣西域水道記云安西州城西百五十里有百爾  
齊堡蘇勒河舊流至堡而止岳鍾琪鑿河西引至  
碶碶沙石會黨河水入漏沙漸微細不能通流黨  
河之尾趨西支者多趨東支者少蘇勒與東支並  
盛時兩水衝激亦難行舟如記說今渠雖開通仍  
隔漏沙水道提綱云布隆几勒河西流至古沙洲  
北境有西拉噶金河自南來注之又西北瀦為巨  
澤所綴尚不入密然水盛時深廣成渠不為漏沙  
所涸固自確鑿古時無西渠布隆几勒河別流瀦

於達巴遜池此水全流東注自得暢行今渠卽古  
瀆之遺要無疑義圖說依據提綱不考古迹乃疑  
西拉噶金河西流又其水入布隆几勒河與志  
不合改氏置水爲玉門縣故赤金衛南山水赤金  
衛地漢時入酒泉郡玉門不隸龍勒龍勒有陽關  
玉門關證以郡下云正西關外有白龍堆沙有蒲  
昌海西域傳云西域東則接漢阨以玉門陽關自  
玉門陽關出西域有兩道從鄯善傍南山北波河  
西行至莎車爲南道自車師前王廷隨北山波河  
西行至疏勒爲北道兩文龍勒自是敦煌極西之  
縣不可移置郡東圖說依附水形忘縣志所在失  
之愈遠今敦煌縣中別無東北入澤之水西拉噶  
金河下流西行有西域傳穿渠之文  
可證提綱以爲氏置水自無可易

鱧得 千金渠西至樂洎入澤中

未詳

蒙按澤中當作羌谷應劭曰鱧得渠西入澤羌谷

澤字亦衍羌谷卽述此文也千金渠蓋今甘肅張

掖縣北境之張掖河及所合入之山丹水西北流

至高臺縣與擺通河合

入澤下綴中字志無此例據音義文爲入羌谷之誤

無疑中卽谷之壞體又涉下羌中之文而譌澤字

右旁下半亦卽羌之殘贖羌字闕存上半後人因

增改爲澤音義中澤字復涉誤文而衍也應據本

自作羌谷顏所引音義文亦自無澤字不然澤與

羌谷水何由混合爲一入澤下又云羌谷文義更

何由通羌谷水與張掖河同委異源史記夏本紀

正義引括地志云合黎水一名羌谷水亦名張掖

河與太平寰宇記呼蠶水亦名羌谷俗又謂福祿

河一例並據下流之合以附上名非上流卽爲一

錄入

羌 水出羌中東北至居延入海過郡二行二千一

百里

今甘肅張掖縣張河出縣西南境東北流至縣北境及縣北之山丹水北流出邊至蒙古額濟納舊土爾扈特分流西入索廓克鄂模東入索博鄂模卽居延澤也凡西北之水入澤中者志或云入海也

蒙按羌谷水蓋今甘肅高臺縣擺通河出紅崖堡南山北流出邊至蒙古額濟納舊土爾扈特分流西入索廓克鄂模東入索博鄂模卽居延澤也凡西北之水入澤者志或云入海也二千當作三千



山丹水自窮石山發源至入鄂模水道提綱云二千餘里除去擺通河口以上四百餘里加紅崖堡南山發源以下里數亦近二千里約漢里三千有餘故知二字必誤若羌谷水爲張掖河較擺通河里數又遠則并不止三千一百矣

刪丹 桑欽以爲道弱水自此西至酒泉合黎

今甘肅山丹縣山丹水也其水西北流與張掖河

合金城郡臨羌下云有弱水祠其祠在臨羌西則非祠此水蓋祠今青海卽臨羌下所云西北塞

外之仙海也青海水不能浮舟故亦謂之弱水矣

蒙按弱水蓋今甘肅山丹縣長城水也西南流納

縣南境水曰山丹水又西北流與張掖河合志云

桑欽以爲者臨羌塞外有弱水祠亦祀古弱水尙